

DISPUTATIO INAUGURALIS  
MEDICA  
DE

RABIE

Seu

HYDROPHOBIA,

QUAM

COELESTI ARCHIATRO CLE-  
MENTER ANNUENTE,

EX AUTORITATE ET CONSENSU

NOBILISSIMI ET GRATIOSISSIMI

MEDICORUM ORDINIS

IN ILLUSTRIS AC INCLYTIS

LUDOVICIANA

PRO LICENTIA

Summos in Medicina Honores & Privilegia

Doctoralia ritè impetrandi,

Excell. Dn. Dn. PROFESSORVM

*examini submittit*

PHILIPPUS HENRICUS

Beyer Moeno-Francofurtanus.

*Ad Diem 18. Martii M. DC. LXIX.*

Horis & loco consuetis.

---

GISSÆ, Literis KARGERIANIS.

DEO  
ET  
PATRIÆ.





# ADSIT S. S. TRIAS!

## Proœmium.



Uti de *Canum* natura & moribus scripserunt, præter horum solertiam vigilemque excubationem, admirandas planè, & notatu dignissimas de amore & fidelitate erga dominos historias recensent, uti apud *Gesnerum* præcipuè & *Aldrovandum in histor. canis*, aliosve plures videre est. Quemadmodum verò sæpiùs accidit, ut, qui amicissimi nobis videri volunt, illi ipsi sint, à quibus vel maximè caveri debebat, juxta *Horatii* monitum;

*Nunquam te fallant animi sub vulpe latentes :*

Ita quoque vel ab ipsis *catellis*, ut vocant, *Melitis*, quos multi in deliciis habent, & quasi in sinu tovent, præsentissima amatoribus pernicies non ratò affertur; ut non sine ratione, quæ imprimis nobis noxia esse consueverunt, *canes* pejus proverbiali dictione *fugere* jubeamur. Quod si enim blanditiæ istæ in rabiem degenerent, en! prælentissimum venenum, quod vel levissimè factâ communicatione homini miserrimam mortem non minitatur solum, sed certò infert, nisi maturè auxilium feratur. Equidem & alia animalia in rabiem efferari, cùm rerum & Auctorum testimonia adsint, non est ut negemus, constat

A

tamen



tamen frequentius hoc malo canes corripī, quod fortē  
 movit *Galen. ut l. 6. de loc. aff. c. 5.* solos canes rabie corripī  
 scripserit, quē etiā, (quamvis assertū hoc miretur) exeu-  
 sare studet doctiss. *Valleriol. l. 3. obs. 3.* Et procul dubio causa  
 hæc est, quod, dūm autores *de Rabie* agere instituunt, ple-  
 rumque de *Caninā* labores suos inscribant. Cæterū non  
 sine horrore leguntur historiæ illorum, qui miserrimo  
 hoc morbi genere perierunt, inter quos & Juris peritissi-  
 mus *Baldus* (teste *Foresto lib. 10. obs. 27. in schol.*) recense-  
 tur. De hoc igitur affectu (quem *ὁ δεινός* vulgò nomi-  
 nant,) cū Gratiōssima Facultas Medica, ut pro *inau-*  
*gurali disputatione* aliquod eligerem argumentum, bene-  
 volo mihi indultu concesserit, nonnulla literis consigna-  
 re animo constitui, non quod mearum virium esse confi-  
 dam, sive dignitatem sive difficultatem hujus negotii ju-  
 sta tractatione assequi: sed potius, quod in id generis ar-  
 gumentis, tam publicè, quàm privatim informari am-  
 pliùs, atque erudiri maximè desiderem. Neque vitio mi-  
 hi vertetur, sicubi sapiùs rem acu haut tetigero; cū e-  
 nim, ut scribit *Borellus Cent. 1. obs. 74.* nulla abstrusioris  
 indagationis exempla in tota sint Medicinā, quàm  
 quæ cottidiè in demorsis à cane rabido obveniunt; fa-  
 cilè quilibet colliget, me non nisi laudabili excitatum di-  
 scendi ardore, minimè verò virium & ingenii fiduciā in  
 hanc arenam descendisse. Ne verò illotis hoc fiat mani-  
 bus, DEUM T. O. M. supplex veneror, dignetur mihi  
 suam largiri benedictionem, ut omnis meus labor impri-  
 mis in Divini Nominis sui gloriam, Doctorum atque  
 Ductorum meorum honorem, certam ægrotan-  
 tium salutem, meique denique ipsius  
 emolumentum cedat!



## CAPUT I.

Tam *Nominalem* quàm *Realem* definitionem exhibet.

## §.1.



*Hydrophobiam*, affectum sanè miserrimum, imò naturæ (ut *Heredia* inquit *lib.1. disput.1. cap.1. de Hydrophobia*) miraculum explicare dùm adgredior, meritò ad tria illa, quæ *Gal. in front. l.1. de vict. rat. in acut. τὰ ἐπὶ καὶ παρὰ ἑορταῖς τέκμαρσιν*, tanquàm opportuna ad bene medendi rationem, proponit, animum adverto.

§.2. Sunt autem illa *Diagnosis, Prognosis, & Θεραπεία*. *Diagnosis* primum obtinet locum, tam quæ rei essentiam, quàm quæ παθογνωμονικὰ ejusdem signa respicit. *Prognosis* prænotio futurorum alteram classem constituit. *Θεραπεία* verò, servati civis cœronam hinc tandem quasi imponit.

§.3. In *Diagnosi* quatenus affectus essentiam & ideam respicit, duplex se sistit in limine *definitio*, una *nominalis*, altera verò *realis*. *Nominalis* est nominis interpretis sermo & absolvitur *Ety-mologia & Synonymia*. *Synonyma* plura adsunt. Autores enim qui de hoc affectu tractant, varias eidem appellationes imposuerunt. A plerisque *Hydrophobia* vocare luevit, quòd eò affecti, aquam, imò omnia liquida exhorrescant, de quo infra. Aliis insuper sub nomine *rabiei caninae*, *morsus canis rabidi*, vel *veneni canis rabidi* venit, uti apud *Cardanum, Mercurialem, Capirovaccium*, & alios videre est. Idque non propterea, quòd non nisi à canum rabie hoc malum infligi queat; (nam & alia quoque animalia in rabiem ferri, supra jam innuimus. Sic teste *Aureliano l.3. de Morb. acut. c.9. & Barth. cent. 5. hist. 52.* lupi, ursi, leopardi, sinix, asini, muli, mustellæ rabie corripuntur, atque ab eorum morfu in rabiem homo incidit. Præter dicta animalia, leones etiam rabie tentari atque feles testantur *Zac. Lusitan. lib. V. histor. 17. pag. 846. Schenck. lib. 7. pag. 859. Pareus lib. 9. c. 15. Amat. cent. 7. curat. 65. gallum quoque*



quoque rabie affectum, triduoque hominem interemisse notavit *Baccius* in suis *prolegomen. & antidot. it. Hildan. cent. 1. obs. 86. pag. 65. Sever. de vip. pag. 147. & 377.*) Sed quod canes, ob peculiarem & naturalem ad hunc affectum contrahendum inclinationem, uti placet *Codronchio c. 9.* præ reliquis animalibus in rabiem agantur, cumque inter homines familiarius alantur, frequentius etiam ab illis malum hoc ipsis domesticis infligatur. Præterea *Cel. Aurelianus, Heredia & alii* quam plurimi aliam tradunt inscriptionem, de his, qui aquam timent, vel de affectione formidinis aquæ, vel ut Græci appellant, *ὕδρφοβία*. Hinc *Aurelianus* scribit, *hydrophobiam* nomen sumplisse ab accidenti, quod est vehemens aquæ timor, & quamvis rabidi omnem liquorem metuant, à metu folius aquæ, quam magis timent, consuetudinem primò obtinuisse nomen, quod inter cæteros liquores plurimum aqua præstet, & propterea *C. Cels. & Galen. lib. 9. meth. medend. cap. 5.* ita affectos à Græcis *hydrophobos*; *Budaus* verò in *commentar. ling. græc. hydrophobicos*, & *Mercurial. hyttophos* appellari, testantur. Germanis dicitur *Wasser-scheu*. Sed satis de nomine.

§. 4. Rem ipsam nunc videamus, quæ omnium optimè definitione explicatur; Omnis enim quæ à ratione suscipitur de aliquâ re institutio, debet à definitione proficisci, ut intelligatur, quid sit id de quo disputetur, verba sunt ipsius *eloquentia parentis lib. 1. Officior*. Placet autem nunc talem sistere: *Hydrophobia est affectus p.n. à veneno quodam peculiari in animali (et præsertim cane) genito, et homini communicato, cum delirio vehementique liquorum omnium, sed aqua potissimum, abominatione. Generis loco Morbum pono.* Est enim p.n. corporis dispositio, ob quam variae ejus actiones læduntur. Cum verò triplex morbi genus occurrat, prout nempe vel *similarium* vel *organicarum* partium constitutio læditur, vel denique his communis *unitas* solvitur: prius expendendum, ad quodnam morbi genus prædictum hoc miserandum, pertineat? Eò expeditio postea ad causarum penitiorem indaginem nos conferemus. Et licet *continui solutio*, quæ morbus communis vocatur, quam maximè cum hoc affectu concurrat, dum nimirum rabiosum animal cuidam corporis parti vulnus infligit: ab hac tamen simpliciter malum hoc non provenire, ex



eo patet: quoniam 1. non omnis partium solutio, nec 2. omnis animalis morsus hunc affectum producit, & 3. quandoque etiam citra morsum ac unitatis solutionem, solo veneni appositu, hydrophobia inducitur. Deinde nec ad instrumentalium morborum genus hic referri affectus potest, propterea quod in eo nec partium *conformationis* vitium adsit, nec *magnitudo* vitietur, nec *numerus* excedat aut deficiat, nec denique *situs & connexio* varientur: Horum enim quodlibet in pristino suo atque naturali statu persistere, nec manifestè mutari, certum est. Relinquitur igitur tertium morborum genus, quod *similarium* partium *intemperiei* debetur, ubi quidem non tam in *qualitatibus manifestis* quam potius *occultis*, radicem mali latitare, adeoque totius substantiæ morbis hunc affectum annumerandum cum Celeb. *Horstio*, Tom. 3. pag. 103. aliisque pluribus existimo. Neque obscurè id symptomata supervenientia docent, longè scil. graviora, quàm aliàs simplicis morsus natura præ se ferre solet; ut de occulta vi, quæ cor ex improvviso impetitur, nihil jam dicamus. Neque moveri me possunt, quòd nonnullis hæc ad morbum totius substantiæ evincendum parùm facere videantur, ut proinde pro simplici per morsum quemvis inflicto vulnere vel ulcere haberi debere credam, siquidem non tam morsus, quàm potius, quod mediante hoc communicatur, virus hic considerandum venit, quò præsentè, cur non, qualis causa, talem quoque effectum esse pronunciemus? Absolutò genere, ad *differentiam* specificam, quæ est altera pars essentialis nostræ definitionis, in qua scil. formalis ejus consistit ratio, per quam hydrophobia ab aliis affectibus distinguitur, me convertò; delineatur autem hæc in reliquis verbis, ubi talis indigitatur morbus, qui à veneno quodam peculiari in animali genito *degender*, homini communicatur, cumque delirio ac vehementi liquidorum omnium, sed aqua potissimum abominatione conjungitur. De quibus nunc pro instituti ratione viriumque modulo paullò fusiùs agemus.



## CAPUT II.

### Subjectum proponit.

§. I.

**F**ormali ratione, genere scilicet & differentiâ explicatâ ad materiam, subjectum nimirum, pergo: In definitione quidem totius corporis mentio facta est, interim in designando πρώτον δεικτικόν maximum occurrit pondus, dissentiunt enim summopere inter se Autores: Nervos quidam pro loco affecto accusârunt, eâ ratione permoti, quòd in rabie fiant convulsiones & alia videantur nervorum mala. Alii membranam Cerebro proximiorē pro parte affecta agnovēre, quoniam rationalis animæ domicilium in hac membrana esse situm, existimabant: Quidam in Diaphragma potissimam culpam transtulerunt, quòd dolor in ipso & impedimentum occurrat. Alii os ventriculi accusandum judicârunt, eò quòd vomitus bilis, singultus & appetentia insatiabilis bibendi in rabie adsint, quæ omnia sunt ventriculi symptomata: Quorundam ea fuit opinio, Cerebrum & ejus membranas esse propriè sedem affectam: Sunt qui arbitrentur locum affectum non esse unum, sed plures, cor scilicet, ventriculum, diaphragma, caput & ilia: Inter alios Mercurialis & Costerus cū existiment essentiam hujus morbi sitam esse in aquæ timore, locum propriè affectum cerebrum solum esse autumant, cū irrationalis aquæ timor immediate à prava cerebri intemperie proveniat.

§. 2. Nos verò ut distinctè hac de re agamus, distinguimus inter subjectum *Primarium* & *Secundarium*: illudque cor esse, hoc v. totum corpus, statuimus. Cū enim ex hætenus dictis constet, malignitatem in hoc affectu utramque paginam, ut ajunt, implere, procul dubio cor præcipuè à Veneno, vitæ fonti suâ naturâ insidianti invadetur; postea verò & reliquæ corporis partes veneni vim experiri coguntur, modò hæc modò illa majori quidem cum impetu, prout veneni præsentis natura, vel huic, vel alii parti peculiari, nobisque ut plurimum absconditâ ratione adversatur: Sic lepus marinus post cor, pulmones lædit, cantharides vesicam, hyosciamum cerebrum; & quàmvis venenum antequàm ad cor



cor perveniat, multas pertranseat partes, eas tamen primò non lædit, quoniam in quacunque corporis parte insignis Spirituum vitalium copia reperitur, quibus, cum venena adversa sint, accidit, ut illi tanquam hostem hunc averlantes ac fugientes, ad principium, centrumque, cor, ad sedem veluti propriam ac tutissimam sese recipiant, illudque per consequens insigniter lædant, & veneno ita imbuti cor inficiant atque coinquinant. Quæri autem hîc posset, qui fiat, quòd, cum res ita sese habeat, aliæ partes, per quas illi infecti spiritus vitales transeunt, antequàm ad cor perveniant, non inficiantur? Ubi quidem hanc lubesse causam autumo, quòd pedem ibi non figant, sed transeant saltem per illas partes, adeoque vim suam atque efficaciam, uti in corde, in quo veluti concentrantur, magisque accenduntur spiritus, exercere haut valeant. Præterea & si videatur, quod cum spiritus vitales veneno facti similes sint, potiùs debeant confugere ad locum veneni, quàm ad cor, nihilominus cum major analogia interveniat ipsis cum corde, à quo tanquàm à principio prodeunt, quàm ipsis venenis, propterea ad ipsum (cor inquam) statim confugiunt. Cœterum, licet *secundarii* subjecti vicem varias quidem corporis partes subire posse, non negem, imprimis tamen *cerebrum* hoc in affectu laborare, cum hoc actiones ejus læsæ satis ostendant, statuere nullus dubito.

### CAPUT III.

## Causam rimatur *immediatam*

## & *proximam*.

#### §. 1.

**I** *Immediatam* igitur hujus mali causam, *venenum peculiari modo dispositum, & ab animali rabido corpori communicatum* esse, ex definitione est colligere.

§. 2. Sunt equidem, qui indolem atque ideam rabiei in excessu solum qualitatium manifestarum siccæ scil., vel calidæ & siccæ, ac in corruptione humorum manifestâ consistere putant, verum melius isti nobis sentire videntur, qui proprietatem quandam occultam, atque venenosam agnoscunt, id quod etiam ex eo mani-



manifestatur, quòd, sive cum *Fracastorio l. i. de morb. contag. 3. putredinem*; vel cum *Aegineta, Aëtio, & aliis intemperiem calidam & siccam*, vel cum ipsius *Galenì Præceptore Pelope immo- dicam siccitatem* accusare velimus, nuspiam tamen firmo stare ta- lo detur: neque enim vel putredinis signa adsunt, vel dictæ in- temperies ad constituendam hujus mali essentiam sufficiunt; quin potius si adessent, quæ quæso tamdiu insignis caliditatis & siccitatis effectus latitare posset, absque multivariâ actionum corporis læsione? ut ne quid jam dicam de curatione, quæ si ma- lum à manifestis proveniret causis, longè faciliorem sese, nob. ostenderet, neque ad ea, quæ occultis viribus agunt, confugien- dum esset.

§. 3. Commodè hîc subvenit exemplum à *Fernelio lib. 2. de abdit. rer. caus. c. 14.* adductum de quodam lupo rabido, qui utut variè præparatus fuerit, tamen omnes illi, quibus esui propina- batur, rabie correpti sunt, quod fieri non potuisset, si natura & essentia hujus mali consisteret in primis qualitatibus ac in tem- peramento, cum ignis omne temperamenti genus facillimè mu- tare, rerumque omnium, quæ coctione vim ejus recipiunt, quali- tates manifestas superare possit.

§. 4. Cæterum ita cum veneno hoc comparatum est, ut eodem infecti, alii citius, alii tardius in rabiem agantur: non- nulli statim & post paucos dies, & infra septimanæ spatium, qui- dam post longius tempus; sed plures adhuc post quadraginta dies, teste *Cæli. Aureliani d. l. Musa Brasavolus, lib. 2. aphor. com- ment. 23.* scribit, repertos esse aliquos, qui 17. anno post mor- sum rabiem contraxerunt. *Guainerius* in tract. de venen. cap. 12. scribit, se à fide digno accepisse, quendam post decimum octavum annum à canis rabidi morfu in metum aquæ incidisse. *Nicolus Florentinus* testatur filium interfectoris in campo S. Pauli Vene- tiis à cane rabido demorsum, & curatum à Medicis non edidisse rabiei signa, nisi transactis octo mensibus. *Gesnerus lib. 3. ep. st. medic.* scribit de quodam lithotomo, qui ante 6. vel 7. hebdoma- das à cane rabido morsus, cum interim nihil mali sensisset, statim aquæ timore superveniente, intra biduum mortuus sit. Post tertium annum Theſſalonix hominem à cane rabido morsum in rabi-



rabiam agi, vulgus vidit & testatur *Amat. Lusitan. cent. 7. schol. curat. 41.* Immo v. ad 40. usque annos hujus veneni seminarium latuisse annotavit *Horstius. Salmuth* quoque cent. 1. observ. 96. Venenum canis rabidi diu latitans recenset. Post 7. mensem in rabiam incidisse Adolescentem quendam recenset *Forest. 10. obs. 28.*

§. 5. Rei hujus admirandæ ratio si quærat, hæc forsan reddi posse videtur: Veneni ex morfu canis rabidi (de quo principaliter loquimur) ea plerumq; natura ac proprietas est, ut non cōfestim atque de subito primo insultu hominem ad extrema, id est, aquæ metum, & hunc consequentem mortem deducat, quod pleraque, alia vehementiora venena scorpionis, viperæ &c. faciunt: Sed tam diu manifestâ absque læsione in corpore delitescere potest, usque dum tractu solo temporis aliquâ principali parte consentiente, universum corpus alterare potens est, uti colligendum ex *Galen. 6. de loc. affect. c. 5.* Pariter quemadmodum venena alia intus accepta nonnunquam citius, aliquando tardius interimunt, ita & venenum rabidum agere potest. Apud scythas quasdam radices mortiferas reperiri, quarum aliæ confestim ubi fuerint gustatæ, aliæ post interimant, & harum aliæ celerius, aliæ tardius, ita ut nonnullæ tabe quâdam paulatinâ possint consumere, testatur *Theophrastus lib. 9. de hist. plant. cap. 15.* Turcas & Indos, qui venena scite tractant, eadem ad determinatum tempus ita dextrè & artificiosè concinnare, ut rarò suis frustrentur votis, auctor est *Amat. Lusitan. in cent. 6. curat. 88.* De qua re ulterius possunt consuli *Ponzettus lib. 1. cap. 13. it. Amat. Lusitan. cent. 2. curat. 65. Joubert paradox. 3. lib. 27. Pareus de venen. cap. 3.* Verùm diversitatis hujus ratio adscribenda esse videtur vel ipsi veneno, vel subjecto cui inditur, vel extraneis causis resistantibus: *Veneno:* quod vel fortius vel debilius est, idque aut à tempore, aut individui, unde id ad hominem emanat, constitutione ac rabie: hinc quò venenatius est animal, ac sæviore rabie percellitur, eò truculentius & majoris activitatis venenum excutit: eoque magis, quo id fit tempore ferventiore & sicciore. Ipsius *subjecti* ratione, vel citius vel tardius operatur venenum, nam si corpora imbecilla sint, vel pravis humoribus referta, citò venenum in illa agit: si robusta & excrementis vacantia, tardius.



§. 6. His porrò accenseri potest victus ratio & aëris ambien-  
 tis qualitas. Nam si demorsus pravâ utatur victus ratione, &  
 aër sit intensè calidus, faciliùs venenum edit suam operationem;  
 quod probat morsus Aspidis, qui, si sub sole ardenti, in media æ-  
 state aliquē mordeat, in momento quasi hominem mori, ferunt:  
 quòd si verò tempore hyberno & frigido contingat, tardius vi-  
 tã privatur, nam æstivo tempore in pravaque victus ratione, de-  
 terius venenum, & majoris efficacix producitur: temporis us-  
 frigidis, ac in bona victus ratione, quæ veneno huic resistere pos-  
 sit, mitius, ac minoris virtutis generatur. Præter hæc omnia de-  
 niq; ipsius quoq; partis, quæ demorsa est, ob varietatem nunc ci-  
 tius, nunc tardius rabie tentari demorsos posse cõstat: Si eni n ve-  
 na, arteria, nervusq; comorsus fuerit, citius & brevior tempore,  
 partibus nobilioribus & principibus venenata qualitas commu-  
 nicatur, præsertim, si rabies mordentis canis fuerit intensa, sub-  
 jectumq; maximè dispositum ad concipiendam flammam: sin-  
 tecus, tardius. &c.

#### CAPUT IV.

### Causam Mediatam, Internam & Ex- ternam explicat.

#### §. 1.

CUM de causâ proximâ atque immediatâ in præcedenti ca-  
 pite dictum sit; ordine sic requirente, de causâ Remotâ, atq;  
 mediatâ agendum venit. Duplex autem ea occurrit vel interna  
 vel externa.

§. 2. Internam quod attinet, generari venenum hoc cum  
 Viris Doctissimis statuimus ex peculiari humorum in cane, alio-  
 rumq; animalium corruptione, & pravitate, quam in tempera-  
 mento minimè consistere, inde patet, quod alia omnia animalia  
 quæ rabie corripuntur, ejusdem essent temperamenti, id quod  
 tamen cum ratione & experientia plurimum pugnat. Consistet  
 itaq; in occulta potius & ineffabili horum *ἰδιουμεγεία* quem-  
 admodum & in aliis, quæ à proprietate aliqua agunt vel patiun-  
 tur,



tur, fieri observamus. Quòd verò hoc venenum haut consequatur ullam insuper temperamenti conditionem, sed à proprietate, & ut loqui amant cum Philosophis Medici, à totà substantia sit, inter alia quoque hinc porrò patet, quòd non solum maximo æstu, sed etiam frigore maximo canes & lupi rabiem incidere soleant, quod si à caliditate & siccitate tantummodo affectus hic produceretur, fieri minimè, ut arbitror, posset; cùm à causa frigidissimâ effectus calidissimus non, nisi fortè valdè per accidens, oriatur; quin potius ab utroque excessu cùm humores corrumpere, vel movere corruptos uterq; aptus natus sit, hoc accidere vero maximè consentaneum videtur.

§. 3. *Externa* causa nobis dicitur, quæ extrinsecè accedens malo occasionem præbet, ubi quidem contagium utramque implet paginam: Cùm verò hujus plures occurrant modi, ut distinctè res proponatur magis, de singulis ordine dicemus.

§. 4. *Primò* igitur venenum hoc per morsum, sive eò inflatum vulnus salivâ seu spumâ in corpus immisâ, communicatur, Expertus est id præter alios oppidò multos, sponsus ille nobilis, cujus meminit *Salmuth. Cent. 1. obs. 96. p. 58.* qui sponsæ suæ brachia, scapulas &c. [horribile dictu;] canis instar, dentibus arrofit ac dilaceravit. Neque verò à morsu tantum canis, vel aliorum animalium rabidorum funestum istiusmodi periculum inferitur, quin ipse homo homini lupo quandoque est, quod in proverbio aliàs dicitur, siquidem rabie correptus ubi alium momorderit, rabiosum efficit, uti *Galen. l. 6. de loc. affect. c. 5.* ipsaque experientia docet. Neque mirum hoc est, cùm & irati hominis morsum mortem non rarò secutam *Paulus Aegineta l. 5. c. 26. Cels. lib. 5. cap. 26.* aliique testentur, cujus etiam non nulla exempla notatu digna *Zacut. l. 3. prax. admirand. obs. 84.* proponit,

§. 5. *Deinde* citra morsum quoque, solâ spumâ scilicet vel manus impositione, vel de osculatione, communicatâ labes hujus mali affricari potest. Sic duos se vidisse testatur *Matthiolus in lib. 6. Dioscorid. c. 36.* qui spuma tantum perfusi, nullo quidem ex morsu accepto vulnere miserum rabiei affectum contraxerunt. Equidem *Petrus Salius lib. 2. c. 10. de morb. contagios : & Vidius Vidius part. 2. de curat. membrat. sect. 2. cap. 6.* arbitrantur, venenum il-



lud non posse corpori communicari per simplicem contactum  
 sed dilaceratione cutis indigere : nam tunc vapor veneficus dila-  
 ceratâ cute, & sanguine educto, cum calore & spiritu per conta-  
 ctum dentis & spumæ animalis rabidi, interna viscera penetrat, &  
 similem affectum inducit. Verum enim verò licet is non sim,  
 qui tantis contradicere viris debeam, attamen non possum non  
 fateri, tantum hîc apud me valere Galeni auctoritatem cum ratio-  
 ne & experienciâ firmatam, ut deferere illum haut possim. Tan-  
 tam verò hîc in cane humorum corruptionem ( ob innatam ejus  
 concipiendæ dispositionem ) fieri asserit, ut solùm ejus sputum,  
 si humanum corpus saltem contigerit, rabiem (& consequenter  
 hydrophobiam) excitare possit. Idem confirmat exemplū, quod  
*Forestius* 10. obs. 27. refert de Baldo Juris utriusque peritissimo,  
 qui Tridenti ex rabientis Catuli saliva inferiori labro vix appro-  
 ximata, quarto ab inde mense miserè occubuit. *Cardanus* quo-  
 que commemorat exemplum profectò mirandum lib. de venen-  
 de Patritio quodam Veneto Alexandro Brasca, ex osculato cane  
 rabiente, quem amabat, antequàm mitteret eum ad occidendum,  
 rabido factò. Simile quidpiam Idem *Cardanus* tract. de venen-  
 narrat, Patritium quendam Venetum Joannem Coqueranum in-  
 fectum fuisse rabie post multos dies, ex solâ impositione manus  
 in os canis rabidi, & si eum canis non momorderit. Simile quid  
*Palmarius* lib. 6. de morb. Contagios. fol. m. 266. & 267. ubi :  
*Tanta, inquit, veneni est pernicies, ut non morfu modo, sed solo et-  
 iam contactu saliva rabiem & hydrophobiam excitare visa sit.* Ex-  
 emplumq; proponit cujusdâ rustici qui hydrophobus, cum libe-  
 ros exosculatus esset, omnes ita infecit, ut septimò illicò die mi-  
 ferrimâ morte, miserrimum Parentem comitati fuerint. Insu-  
 per *Cal. Aurelian.* lib 3 acut. morb. cap. 9. it : *Zacut. Lusit.* lib. 6.  
*histor.* 12. pag. 840. & alii mentionem faciunt de quadam sartrice,  
 quæ cum vellem à cane rabido commor sam ore & lingua ad con-  
 sarciendam contrectaret, rabie fuit correpta. Quin & sola inspi-  
 ratione seu afflatu rabidi animalis aërem inficiente posse com-  
 municari hoc virus, inter alios confirmat *Cal. Aurel.* scribens,  
 Themisonem, amico aquam expavescenti, morem gerentem, &  
 officium exhibentem, similem contraxisse affectum. Hoc idem  
 qui-



quibusdam aliis accidisse confirmat, id autem non ex aëre venenato venire, sed ex quadam sympathia existimat *Dioscorides*. Idem afferit *Cal. Aurel. acut. morb. lib. 3. cap. 9.* quod tamen difficultate non carere videtur, siquidem nullæ tales manifestæ viæ ad cerebrum patent, quin potius cordi & pulmonibus, quippè ad quæ viscera facilè talis vapor venenosus ( præsertim per inspirationem, quæ pulmonibus propria ) inspirari potest, labem primò communicari, non adeò absonum foret statuere. Cæterùm licet non planè negemus istiusmodi communicationem, tamen ut rariorem agnoscimus, ita quoque non nisi, ubi venenivis maxima fuerit, locum habere posse, probabile judicamus. Cùm unguibus verò, quomodo rabiem inferre possint talia animalia rabida ( quæ nonnullorum est assertio ) nullam video rationem, siquidem in dentibus & saliva latere venenum, & non in unguibus, omnes affirmant; nisi dicamus, venenum non inferri ex unguibus simpliciter, sed ex unguibus salivâ venenatâ imbutis atque infectis.

§. 6. Quid tertio *carnes animalium rabidorum commestæ* efficere valeant, exemplum ex Fernelio superiùs allatum, non obscurè indicat. Sic ex *Lycosthene* narrat *Barbhinus*, hospitem quendam sceleratum convivis carnes suis à rabido cane demorsas apposuisse, ex cujus esu omnes rabiem contraxerunt. Idem hoc narrat; suam, cùm in rabiem acta esset, à rustico occisam & sepultam esse. Sed cùm negligentius & non satis profundè eam sepeliisset, accidit, ut tempore hyberno cadaver erutum vulpes devorarint, ex cujus esu vulpes & ipsæ rabidæ evaserunt & maxima parte miserè perierunt. Huc etiam pertinet, quod observavit *Timeus lib. 7. cas. 23. pag. 327.* Venenolum rabidi canis contagium, esu lactis vaccini communicatum fuisse.

§. 7. Neque silentio involvendum reor, ( quandoquidem ad causam venenum hoc in corpore latens excitantem pertinet, ) quod de arbore *Sorbo* Autores referunt, eos nempe, qui sub ea versantur, aut dormiunt, aut furculum saltem ejus tangunt, hydrophobiæ recidivam pati; accedunt & ad hanc arborem, *cornus*, & *sanguinarix* tactus. De quibus *Matthiol.* inquit: *Si comorsetur rabido animali ante annum absolutum tetigerint vel cornus vel*



*sanguinaria plantam, eos inevitabiliter in rabiem incidere. Sic narrat Guainerius tract. de venen. cap. 12. venenum à morfu canis rabidi communicatum, quod per decem & octo annos latuerat, excitatum fuisse, cum morsus sub umbra sorbi maneret, ægrumque intra tertium diem rabidum mortuum fuisse; quod & Fernelius affirmat. Ex quibus recensitis duo colligere possumus: primum causam hujus mali esse venenum totâ substantiâ peccans, prout superius ostendimus, nec ulli intemperiei adscribi posse, quia nec à tactu, nec ab umbra, ac brevi temporis spatio, intemperies fieri valet. Alterum est inter hoc venenum & sorbum, cornum & sanguinariam maximam antipathiam, vel potius sympathiam, ut aliis placet; cum ab his excitari exemplis comprobatum sit, cujus nulla alia manifesta causa dari potest, quàm ea, quæ communis est omnibus his, quæ à propria substantia aliquam peculiarem facultatem habent, nimirum quod à proprietate illud agant: Sed de his nunc satis.*

## C A P U T V.

### Diagnosin exhibet.

#### §. 1.

**E** Legans est sententia Hippocr. lib. de Medico; ubi, *solus is, inquit, qui signorum cognitionem habuerit, ritè curationem adgreditur.* Ut igitur fidelissimi ductoris monitum observemus, neque empiricorum more in curationem præproperè nimis irruamus, signa hujus affectus ritè examinabimus. Cum verò certum quid pronunciari nequeat prius quàm, nùm canis, qui vulnus inflixit, rabie correptus fuerit, nec ne; constet, ante omnia canis rabiosi quænam sint indicia in limine quasi ostendemus.

§. 2. Canis igitur rabiosus potum & cibum averfatur, & quamvis, ut scribunt Autores, siti angustetur, non bibit, sed eum fugit, imò quandoque post intuitum moritur, ut ait *Rhases*; multâ spumantemque pituitam naribus, & ore projicit, oculos habet rubentes ac igneos, in notos pariter atque ignotos sine latratu irruit, eosque mordet, vox rauca est. Præterea, est macilentus & corpo-



corpore gracilis, caudam demissam inter coxas, tabescentem & extenuatam habet, linguam exertam, seu foras pendentem, tanquam bile infectam; croceam seu rubram vel nigram habet: interdum sine causa percurrit, & deinceps subito consistit, furiosaque quâdam indignatione non prævidentes aggreditur: uti videre est apud *Galen. lib. de Theriac. ad Pisonem, Hafenreffer. de affect. cui. libr. 3. cap. 6. pag. 386. 387. Joët. oper. medic. tom. 5. sect. 4. pag. 143. Sennert. lib. 1. part. 2. prax. cap. 16. pag. 433. Vid. Vid. part. 2. sect. 2. decurat. generatim. cap. 6. pag. 347. Gass. a Reies. Fr. Elys. ej. jucund. camp. quæst. 61. fol. 465. Forest. observ. 10. obs. 27. pag. 350. Blas. medic. univers. pag. 391. Vffenbach. Thesaur. chirurg. lib. 20. de venen. cap. 11. pag. 438.*

§ 3. Cum ergo ex dictis jam satis pateat, quâ ratione canem rabidum dignoscere debeamus, è re quoque erit *Morsum*, nûm à rabido vel non rabido animali factus sit, diligentius examinare: scribit autem *Galenus*, morsum canis rabidi esse similem morsui canis non rabidi; ulcus excitatum à cane rabido, ex asse respondere aliis ulceribus per omne tempus. Imò ex emplò, ubi morfu exandescens animal rabie in partem aliquam vulnus infligit, nihil plus doloris aut molestiæ ab initio afferre videri, quàm vulnus non rabiosi. Ad explorandû igitur, an animalis morsus sit venenatus, nec ne, nuces juglandes optimè tritas vulneri imponendas, & aliquot horis vel per noctem, aut diem (prout vulnus magnum vel parvum fuerit; cum à magno vulnere felicius nucibus venenum communicetur) super vulnere relinquendas, & postea ablatas gallo vel gallinæ objici devorandas injungit; si animal, quod momorderit, rabiosum non sit, sospites ac superstites aves manebunt; sin secus, & rabie correptum fuerit, postera die peribunt, iterum què post paucos dies eâdem experienciâ utendum esse, monet. Tritum aliî vulneri imponunt. Alii sanguinem ex vulnere detrahunt, & cum farina offam faciunt, quàm deinde projiciunt gallinis, quæ si comederint eam & intereant, animal rabie erit correptum. Aliud experimentum proponunt alii, medullam scil. panis, mox vulneri affricari jubent, ut sanguine, aliove succo ab ulcere emanante inficiatur, qui panis edendus offeratur cani, qui si illum non solum non edere, sed ne quidem olfacere:



facere voluerit; vel si comederit, inde rabidus fiat, aut moriatur; signum erit morsum fuisse animalis rabidi. Et hæc signa diagnostica sunt ratione canis rabidi.

§.4. Sequuntur nunc *hominis* rabie correpti indicia, quæque simul Mali vel *incipientis* vel *facti* naturam delineant: *Incipientis* verò rabiei primò jam signa recensenda veniunt; quæ *Autore Cæl. Aureliano lib.3. cap.11.* hæc sunt: anxietas quædam, & iracundia sine ratione, insueta corporis difficultas, seu impotentia quædam ad omnem actionem, ventriculi gravitas, vel vellicatio, somnus perturbatus, vigiliæ, timor sine ratione, querela de aëre inclementiore, & quasi austrino, etsi serenus & mitis sit, imbrum recusatio; parvum bibendi desiderium contra consuetudinem. *Ægri* secum loquuntur & murmurant, lucem abhorrent, locaque obscura quærunt, quandoque ipsorum oculis tenebræ offunduntur, & tunc lucem, imò in die etiam lumen accensum optant. In parte olim vulnerata & comorsa, & si ulcus jam longò temporis intervallo fuerit consolidatum, dolor quidam percipitur, versusque caput tendit; quod cum apprehenderit, quædam vertiginis species excitatur, ut æger rectè progredi nequeat. Quæ signa sedulò ac diligenter observanda sunt, cum sint rabiei instantis ac incipientis indicia.

§.5. Ubi verò *facta & confirmata est* hæc affectio, accidit membrorum quædam veluti distensio, pandiculationi similis, sed non continua; adest corporis & faciei rubor cum sudore, & languore quodam, anxii fiunt ægri, oculos torvos & aspectu horribiles habent, in proximos expuunt; quidam canum more, si à canibus morfi fuerint, latratus edunt, & obvios quosque dentibus impetunt, & id quidem sæpè præter voluntatem. Dignum notatu exemplum commemorat *Nicolus, explicans Gentilem in commentar. super Avicennam* de Adolescente quodam, qui dum rabie detineretur, appropinquantes sibi mordebat, matrem verò suam hortatus ille, ut longè ab eo abesset, quoniam à moribus se continere nequiret: in eo enim nondum potentiæ intellectus corruptæ erant, quod ex valida potentiæ resistentia factum est, vel ex agentis imbecillitate. Huic non valdè absimile exemplum legere quoque est apud *Gr. Horst. Tom.2. pag.332. & 333.* Aliqui ex his



ex his delirant, aliqui verò mente constant, usque ad ultimum vitæ terminum. Hoc interim omnibus commune est, ut miro hydrophobiæ symptomate vexentur; nec aquam solummodo, sed & liquida omnia abhorrent; cum vident paucillam aquæ, tremunt ac convelluntur, & his assumtis maximè cruciantur imò non solum visum, sed nec sonitum & nomen aquæ, & liquidorum ferre possunt teste *Aureliano*. Unde verò tantus aquæ metus oboritur, non est eadem autorum sententia. Putat *Avicenna*, rabientes, & si ob propriam Affectus hujus naturam aquæ potum desiderant, eam tamen ubi visu vel alio sensu percipiunt, averfari propterea, quòd in eâ per imaginationem depravatam canis præsens proponatur: hinc *quoties aqua*, inquit *fen. 6. 4. tx. 4. c. 3. eis approximat, imaginantur canem, quare timent ex eò*. *Eustachius Rudius lib. 4. de venen. c. 13.* aquæ timoris hanc esse causam arbitratur, quòd omnia humida actu sint hydrophobicis adversissima, quippè quæ venenum internum augeant. *Bravo Salmaticensis in suo libello de hydrophobiâ* statuit, venenum hoc veluti tyrannum quendam sic imaginationi imperare, ut omninò reformidet, quæ huic veneno opponuntur, esseq; prætereà naturalem quandam antipathiam inter venenum & liquida, cujus ratione fugantur, & rabientem deterrent &c. Alii alias tam admirandi symptomatis rationes reddunt. Nec sanè mirum in tanta rei difficultate autores in varias abire partes, & veniam facile merebor, si judicium hic potius suspendero, vel saltem cum *Gasspar. de Reyes Ely. Camp. q. 62.* præter antipathiam, quæ rabientium veneno cum liquidis intercedit, causam aliam inveniri posse, minimè sperandum esse, dixero. Interim diffiteri non possum, si ulterius progrediendum foret, valdè mihi arridere sententiam *Heredie*, quam *T. 4. disput. 1. c. 1.* exprimit, & cujus summa hæc est: hydrophobiam provenire, ex certa & peculiari cerebri dispositione, quæ splendorem liquidorum visu admittere non sustineat, ob summam antipathiam. Cæterum non me latet, multos adhuc in imaginatâ canis in aquâ præsentia, tanquam verâ causa conquirere, utpote non uno exemplo confirmatâ; verum cum rationes quæ ad hanc ipsam infringendam sententiam afferri solent, non sint minoris ponderis, subscribere priori parti

C

non-



nondum possum : Ipsum sanè *Galenum* si consulo ; invenio quidem illum *lib. de Theriac. ad Pison.* etsi fateatur , delirare hydrophobicos , nunquam tamen canis apparitionis meminisse , sed ad mentis errorem formidinem aquæ reducere. Sed satis de causa hujus peregrini symptomatis. Nunc & reliqua prosequemur, quæ ad signorum censum pertinent. Pulsus itaque sunt inordinati. Quibusdam febricula accedit, nec omnes febre, & illa quidem intensa corripuntur , sicut ex *Galeno* quidam dixerunt ; nam si febriunt , vel levis est febris , nec tam fit ratione venenæ rabidi, quam potius aliis ex causis. Saltus stomachi adest, torpor ac stupor articulorum , extenduntur præcordia ad superiores partes , alvus supprimitur : urina guttatim emittitur , & ut plurimum omnia excrementorum genera retinentur, quamvis id in omnibus non contingat ; vox fit rauca, respiratio difficilis ; corpus jactant inordinate , lingua prominet, & cum morbus augeatur, circa finem evomunt bilem flavam , & frequentius nigram, & singultu corripuntur, quæ tamen symptomata in omnibus non observantur & cum apparent post unum atque alterum diem moriuntur, aliqui etiam paulò ante mortem convulsionibus & maximo stridore dentium corripuntur. Et hæc de *demonstrativis diagnosticis* sufficiant.

§. 6. Ordo nos jam ducit ad diagnostica *distinctiva* signa : quæ nimirum discernunt *hydrophobiam* ab aliis *similibus affectibus* : tres verò commemorat *Cal. Aurelian. Phrenitidem, Maniam & Melancholiam*. De *Phrenitide* primò , differt illa à rabie , quia *Phreneticos* febris continuua , eaque ardens concomitatur, rabiosi verò pleraque nullâ vel exiguâ saltem febre corripuntur. 2. In *Phreneticis* cerebrum , vel meninges inflammatione laborant, nihil verò tale in *hydrophobicis* apparet. Quoad *Maniam* ; A *Maniâ* quoque differt, licet ejusdem species quædam perhibeatur : neque enim vel aquæ timor , vel appetitus ad mordendum alios in *Maniacis* observatur , ut ut quoad furorem quodammodo *hydrophobia* & *Mania* convenire videantur. A *Melancholiâ* quâ ratione distinguatur, non obscure patebit ubi signa *melancholia* Πασχυμωμια cum signis *hydrophobia* conferuntur.



## Signa Prognostica refert.

§. 1.

**P**rognosin ut Diagnosi subnectamus, ordo tractandi exigit. Neque illa sanè omittenda, cùm tanta hujus Med. partis sit necessitas, ut sine ea temerè ad sanandum cura suscipiatur. At verò curationem optimè fecerit, docente *Hippocr. l. 1. prognostic.*, qui *futuras prænoverit passiones*. Cùm autem in prædictionibus tria sint subinde observanda, siquidem, ut Galeni verbis utar *ex lib. 3. de crisib.* An portando oneri quispiam sufficiens sit, hominis robore, oneris magnitudine, & via longitudine antea explorandum est: nihil de Ægrotantis salute prius pronunciare licebit, quàm magnitudinem morbi, naturæ robur, ac futurum statum exploraverimus. Quare & nos tria hæc nunc pensitabimus, primò quidem proposituri.

§. 2. *Signa salutis & Mortis*: Hic autem ratione generis statim fatendum est, affectum hunc gravissimum atque periculosissimum, id quod ex illis, quæ superius de ejusdem essentiâ, hancque comitantibus symptomatibus in medium attulimus, facile est colligere, unde negligi minimè debet, cùm nullus canis morsus parvi pendendus veniat. Interim spes salutis affulget, si malum in principio adhuc versetur; etsi enim venenum canis rabidi longè sit nocentissimum, nihilominus tamen si mox inter initia, antequàm invalescit, & cerebrum invadit, convenientia remedia adhibeantur, non adeò difficulter curatur, verba sunt *B. Timæi von Gûlden Rlee* qui etiam tùm in multis aliis, tùm in hortulano suo hoc se expertum esse testatur *lib. 7. Cas. 22. p. 326*. Eoque faciliùs succedit curatio, quò vulnus minùs profundum, isque quem memordit canis, constitutionis est validioris: plurimùm siquidem non minùs, ac in aliis causis venenatis, valet dispositio subjecti, quæ levi quandoque momento affligitur. Quin & causarum diversitas, modusque contagii, ipsiusque veneni vires multùm hîc ponderis obtinent, ut supra quoque innuimus.

§. 3. *Mortis* verò metum incutiunt ægrotantis constitutio



imbecillior, vulnerisque profunditas & livor, quodsi insuper vulnus arterias dilaceret, brevissimè rabiem inducit; siquidem venenum facillè hoc modo ad interiora unâ cum sanguine permistum penetrare, & varia symptomata producere potest: imprimis autem aquæ timor, ubi supervenit, omnem ferè curationi spem adimit, quemquidem non rarò vel ægri vel adstantium negligentia accelerat. Hinc *Aëtius*, qui à rabioso cane comorsus fuit, si negligantur, vel malè curentur, in aquæ timorem incidere scribit; cui & *Celsus* ὁποῦσφι & est, inquit: ubi ab initio parum malo occursum est, aquæ pavor nasci solet. Idque si acciderit, ferè conclamatum jam esse (ceudictum) plerique consentiunt; Ut unum è multis audiamus, verba *Heredia* afferam, qui d. l. si autem, inquit, jam aquæ formido obsideat, desperata res est, ut veluti miraculum sit, mortis periculum effugere: quam enim timentes moriuntur celerrimè intra tertium, quartum, aut quintum diem; nullus eorum, quos vidi, diem septimum attigit, &c.

§. 4. *Longitudinem & brevitem* v. quod attinet, *acutum* hunc esse morbum non est ut dubitemus, siquidem velociter tempora sua percurrit, cum gravissimorum symptomatum syndrome. Neque obstat, quod ut superius innuimus, ad plures sæpè annos latitare hunc morbum posse tot exemplis confirmetur; illud enim tempus, in quo nondum actu rabie corripitur æger, ægritudini nondum adscribi debet, sed tūc demum, ubi jam manifesta rabiei indicia præbentur; id quod cum veloci semper discrimine, & mira affectus celeritate conjungi suevit, uti ex cit. *Heredia* aliorumque testimonio non obscurè patet.

§. 5. *Modum Eventus salutaris* discussio fomite, & expulso rabido miasmate natura, multum in salutem ægri sudans pollicetur: at verò, ubi hydrophobia supervenit; tunc rabies incrementum celeriter sumit, symptomata pleraque in diversis diversa, exacerbantur, donec miserabili delirio, (quod ministro cujusdam nobilis patritii, & cuidam Sartori Baronis, apud Gr. *Horst.* d. l. ob neglecta vulnera accidit) & maniaco quasi furore plerique vitam cum morte commutant.



## Indicationes elicit.

## §. I.

**C**ognitis causis, signisque tam *Diagnosticis* quam *Prognosticis*, par erit, ut, cum à *Medendo*, *Medica ars* nomen acciperit, ad ipsam accedamus *Curationem*. Optimè autem *Curatio* succedet, si methodum medendi ritè observaverimus: monstrat enim hæc per *indicationes* suas, veluti statuas *Mercuriales*, quâ viâ ad præfixam metam, citra ambages, perveniri queat.

§. 2. Duo autem hîc potissimùm Medico peragenda indicantur: unum nempe, ut statim ac à cane demorsus est, vel alio modo ipsi venenum rabidum communicatum fuit, ne in rabiem aut hydrophobiam incidat, præservetur: ubi quidem tres se obferunt scopi; *primus* est, ut veneno morfu jam in corpus immisso ulterius progrediendi viâ intercludamus; *Secundus*, ut operadetur, ne venenum communicatum per universum corpus diffundatur, ac membra principalia, ne id admittant, sed potiùs à se propellant, roborentur. *Tertius*, ut venenum, & ab eâ impressa mala *Diagnosis* seu malignitas extinguatur.

§. 3. Alterum quod potissimùm *indicatur* est, ut quando jam homo rabie correptus est, ac hydrophobiâ laborat, ab eâ quantum quidem possibile, per valida remedia ex consuetis fontibus depromta, liberetur.

## CAPUT VIII.

## Præservatoriæ Indicationi satis facit.

## §. I.

**U**t itaque homo, ab hydrophobia (quippe quâ præsentē curationis spes in angusto posita est) præservetur, nihil in crastinum differendum: *Ab omni enim arte*, verba sunt Hippocr. in Epist. ad Cratevam, *aliena est res dilatio, verùm maximè à Medicina*. Quare statim ac homo à cane vel alio animali rabido morsus est, aut linguâ, ore, vel alio modo sputum animalis teti-



git, ad valida properandum est præsidia ; Verissimum enim hîc illud poëtæ :

*Principiis obsta, sero Medicina paratur.*

*Cum mala per longas invaluere moras.*

§. 2. Mox itaque ex fonte Chirurgico varia in usum vocentur auxilia, ut recensito primo scopo satisfiat. Sistunt se primo in limine *Ligaturæ*, quæ postquam vulnus ( non aqua frigida ablutum, noxium enim hoc ) sed linteis mundis & quidem siccis ac calidis probè abstersum fuit, non infeliciter, veneno ad interiora cursum affectanti, viam intercludunt : fortiores tamen, monente *Celsol. 5. c. 27.* esse haut debent, ne pars torpeat. Quod si verò hujus conditio *Ligaturæ* usum respuat, adstringentia medicamenta illarum subire vicem possunt, ut *sanguis dracon. balaust. bol. armen. &c.* Postea quoad secundum scopum *Extractio* ni veneni simul statim opera danda est : inserviunt hîc quàm maximè cucurbitulæ, de quarum usu eruditè dislerit *Ant. Santorrell. lib. 19. Antep. med. c. 14. p. 530.* quæ cum largiori flamma imponantur, ut venenum validius extrahatur ; in qua cucurbitulæ applicatione hoc animadvertendum est : si vulnus antea sit magnum, non opus est, nec sectione, nec unctione, ubi verò est angustum, amplificandum est, & carnis non nihil circum quaque auferendum, ac vulnera circularia faciendum (quam circulare sectionem Medici circinationem nuncupant) ita enim venenum è locis tollitur affectis, & licet pars aliqua veneni interiora petiisset, cum multo ac copioso sanguine effluere cogitur, vulneraque sic circularia, diutius aperta, pro morbi conditione, servari possunt. Si autem vulnus sit exiguum, locus mortuus tutò scarificari potest, & quidem si aliquod temporis spatium præterlapsum sit, læpiùs applicandæ sunt, partibusque vicinis altiora vulnera infligenda. Possumus etiam animalium vivorum, ut columbarum, gallorum & gallinarum podicem deplumatum vulnere admove, quorum operatio ut feliciùs succedat, animalium os est claudendum, ne possint aërem attrahere per partem superiorem, & si unum moriatur, mox alterum substitui potest. Vel quod alii magis commendant, animalia hæc viva non longiori morâ dissecta, & adhuc calentia læsæ parti applicentur, quia

non



non solum quâdam proprietate, verum caloricâ podicis, vel interiorum facultate dissecti nuper animalis sit efficacissima virulentia extractio, & doloris, si adsit, mitigatio. Applicari deinde possunt medicamenta maximè attrahentia; inter illa autem recensentur, allium, stercus columbinum, sinapi, nuces juglandes, ruta cum fermento, sal & mel, quibus commodè admisceri potest theriaca. Præprimis autem ab Autoribus quibusdam prodesse, si simul allium, cepa, ac triticum, commansum, acceptum, parti affectæ imponatur, perhibetur. Quod si dolorem interret, intermitteri vel potius cum oleo hypericonis, seu lumbricorum terrestrium misceri debet. *Galenus lib. II. de simpl. med. fac. cap. de cancr. ustis & lib. 3. de composit. medicam: Secundum gen. cap. 5.* commendat mirum in modum emplastrum paratum ex pice, oppoponace & aceto, ut:

℞. Picis lib. j.

Aceti acerrim. ℥j ℥viij.

Oppoponac. ℥iij.

Oppoponax, ut ipse Galenus docet, in cyathis 4. aceti dissolvitur, aceti quod superest, unâ cum pice decoquatur, quod ubi consumtum est, oppoponax additur, & coquuntur, cavendo ne efferveant, scribitque ille, neminem se vidisse, qui illô usus sit mortuus. In mollioribus verò corporibus liquari potest, vino vel oleæ veteri, in robustioribus per se applicatur. Prætereà in lib. de ther. ad Pisonem, felici cum successu expertum se fuisse, theriacam cum oleo rosaceo liquatam, asserit Galenus, qui d. l. videatur. Aëtius serm. 13. cap. 10. laudat medicamentum quoddam, quoniam vehementer arceat inflammationem, & rarè citra magnam utilitatem atque commodum adhibetur, quod seq.

℞. Spum. argent.

Ceruss.

Resinæ piniana ℥j.

Ol. veter. ℥. iij.

Ceræ ℥viij.

Ammoniac.

Thymi amat.

Galban. ana ℥iij.

Ceru-



Cerulam, argenti spumam, & oleum coquito, donec manus non inquinent, deinde liquefacta adjicito, & unito.

Hieronymus Capivaccius lib. 7. pract. cap. 12. laudat seq.

℞. Ciner. cancr. fluviat.

Allii, menth.

gentian. aristol. rot. ana ℥ij.

baccar. laur.

boli armen. ad ℥j.

M. C. succ. menth. f. emplastr.

At longè efficacissimum & expeditissimum in venenatis ictibus præsidium est cauterium actuale, seu *Ustio*, teste *Hildano cent. 4. obs. 88.* (qui tamen superficiale Ustionem haud sufficere monet. *cent. 1. obser. 86.*) quia nihil est, quod tutius ac validius omne veneni genus superare possit, quàm ignis ipse; venenum enim absumit, & diuturnum ulcus, per quod virus effluit, relinquit. Ustione peractâ, obnixè dare operam oportet, ut in existens crusta, quam chirurgi escharam vocant, celerrimè amoveatur, ut venenum quàm citissimè evacuari possit. Nam crusta in vulnere retenta, facit, ut venenum retineatur, & ad corporis interiora penetret. Crusta autem spatîo bidui excidit, si diligenter illinatur vitello ovi, & recenti butyro. Si locus sit carnosus etiam cum manuali operatione crusta removeri potest, in qua, si sponte sanguis exeat, permittendus est in convenienti quantitate exitus. Quod si locus ustionem non ferat, aut æger ignem actualem admittere nolit, laudat Galenus lib. 13. meth. cap. 6. adhibenda medicamenta caustica, & escharotica dicta, inter quæ etiam Mercurius sublimatus, & præcipitatus utiliter usurpatur. Ubi verò deciderit crusta, ut venenum extrahatur, & continuo effluat, factâ vel non factâ in ustione, omni industria ulcus apertum conservari debet, neque permitti, ut cicatricem ducat saltem spatîo quadraginta dierum, ut *Aetius*, *Horstius B. Timæus*, & plerique practici monent.

§. 3. Proponunt nonnulli, extremas partes aliquando præscindendas esse, si partis conditio ferat, cujus rei tria recensentur exempla apud *Galen. in lib. 3. de loc. affect. cap. 7.* qui ab aspidē, aut viperis demorsi digitos amputaverunt, & salvi evaserunt.

Quod



Quod tamen remedium minimè commendatur, nec quisquam Medicus conscientiosus auderet illam operationem administrare, paucissimique reperirentur, qui sanæ partis abscissionem perferre vellent. Secundò non ita necessarium hoc factu esse videtur: quòd venenum canis rabidi non sit tam celeris activitatis, ac venenum aspidis, aut viperæ; quare vel in laudatis auxiliis conquiescere, vel ad alia venenum extrahentia ab practicis affatim proposita confugere possumus.

§. 4. Inter alia remedia pro veneno extrahendo à loco commorso, quidam hoc proponunt, ut nimirum servus aliquis adhibeatur, qui ore vulnere præsertim levi appposito venenum exugat, at verò, cum sit maximè periculosum, ac dubium, id tentare, quod Ethnici atque Gentiles in mancipiis suis licere putabant, in fratribus christiana charitas non permittit, præsertim cum alia remedia, quæ idem præstare possint, sint ad manus; hujus itaque loco vulnere apponere possumus *HIRVDINEM* unâ, vel plures, quæ virus optimè, unâ cum sanguine, exhaurire valent. Ut autem cognoscere possimus, an ex adhibitis auxiliis chirurgicis & aliis topicis remediis omne venenum extractum & dissipatum sit, nihilque periculi amplius subsit, *Paulus ex Oribasio* eadem probatione indigere mandat, quæ scil. ulurpata fuit in cognitione morsus, utrum esset animalis rabidi nec ne, ut fiat emplastr. ex *nucibus juglandibus*, & ulceri applicetur, gallo deinceps offeratur, quòd si post esum moriatur, erit indicium, nondum esse ulcus ab omni veneno liberatum, & propterea vulnus etiam apertum servandum erit; operaque danda est, ut reliquum etiam extrahatur. Si verò non moriatur, erit signum, omnes veneni reliquias absumtas, & vulnere cicatricem remediis, talem facultatem atque potentiam habentibus, obducendam esse.

§. 5. Quod restat, non prætereunda est, hîc controversia quæ apud Autores movetur de V.S. an scil. in hoc affectu administranda veniat, nec ne? Alii suadent eam, dissuadent alii, singulique autoritatibus ac rationibus probare conantur suam sententiam. At verò cum posterior pars, dissuadentium puto, palmam præripere videatur, ipsi non possum non addere calculum meum; **Omnino enim, si quid judicare possum, firmioribus rationibus ful-**



ciuntur illius argumenta; nam sanguinis missio inanitis venis venenum intimius penetrare facit, illud exagitat, & quod pessimum, vires debilitat, quæ tamen in tam vehementi affectu maximè necessariae sunt. Ideò cum nulla utilitas, nullum commodum à V. S. sperari queat quin potius multa immineant discrimina, uti remedium periculosum, & valdè dubium, omninò rejiciendum esse, arbitror. Quòd si verò febris putrida aliqua insignis, vel aliquis acutus morbus ex vitioso apparatu, vel ex aliqua extrinseca causa, ante quadragesimum diem commorso superveniat, qui per sui naturam atque essentiam, necessariò V. S. indicet; si sanguis detrahatur, ad penitiores partes venenum attrahi poterit, & hinc sequi rabies; si sanguis non mittatur, apertum observatur discrimen ex febre, vel morbo acuto ipsi ægrotanti. Ad hunc ancipitem casum suadent, ut sanguis evacuetur, non tamen venâ sectâ, sed applicitis cucurbitulis partibus inferioribus, quibus major vel minor sanguinis copia evacuari poterit, pro majori vel minori sanguinis copia, habitòque respectu ad vires, & sic abundantia diminui, ac venenum à partibus superioribus revelli, & ad exteriora trahi poterit.

§. 6. Ex *Fonte PHARMACEUTICO* nunc haurienda auxilia veniunt: ubi se primum offerunt *purgantia*, de quorum usu varie apud autores judicatur: negativam enim quidam, affirmativam alii tuentur; quicquid autem dicant, maximè purgantia pro hoc debellando hoste necessaria, ex ratione sequenti patebit. Nam cum hujusmodi venenum similitudinem vel analogiam habeat ad humores frigidos & crassos, qui etiam si non reperiuntur in corpore à principio, ex natura tamen hujus veneni, pedetentim ac successivè generantur, cum venenum jam venoso generi sit communicatum, & in his humoribus figatur, si debet educi, illius pabulum evacuetur, necesse est. Ad hanc rationem accedunt auctoritates præclarissimorum virorum, qui cathartica medicamenta maximè commendant. Et si forsan quis *Galen*i auctoritatem in medium proferret, quòd nimirum ille nullam mentionem de purgante fecerit, respondeo, non esse mirum, quòd rem, uti notissimam, omiserit; alibi tamen docet, ubi humores p. n. in corpore redundant, illos omninò esse evacuandos. Cæterum verò  
libenter



libenter concedo, cathartica medicamenta non rectè veneno huic adversari, neque expugnare illud posse, sed potius vi alexipharmacà infringendum; verum tamen hoc mediatè præstare posse, dùm nimirum illos vitiosos humores, in quibus residet venenum, evacuant, adeò, ut ad humorum evacuationem, venenum etiam ipsum extrahatur; nemo prorsus negabit.

§.7. Quò autem tempore administranda sint purgantia, incertum videtur, ob manifestum Autorum dissensum. Alii enim à principio purgationem; Post verò principium evacuationem alii & plerique omnes suadent. Verùm unica distinctione controversia hæc dirimi posse videtur; considerandum nimirum esse modum, quo venenum hoc in corpus immissum est. Si enim labris & lingua venenum in corpus attractum sit, cùm nullus sit locus scarificationibus, cucurbitulis, unctioni ac cæteris similibus, & paucis diebus rabies excitetur, tunc *Rhasis* præceptum observandum, ut mox humores purgentur. Si verò morfu venenum partes externas possideat, in principio purgare non licet. Ideoque cùm *Rhases* statuit, statim in principio esse evacuandum, id de priori casu intelligendum est; de posteriori verò, quando *Græci & Arabes* post principium purgationem adhibendam esse, asserunt, intelligunt tali modo, ne scil. venenum ex vulnere ad interiora corporis trahatur; sed tùm tandem purgantia adhibenda, cùm omnia ritè, ac bene circa vulnus peracta sunt. Et licèt interdum omnibus probè ac optimè peractis, tamen fieri possit, ut aliqua veneni portio etiam quàm minima ad internas partes penetraverit, humores sibi analogos inficere, corrumpere atque in sibi similem materiã vertere possit, ideoque cogitandum de purgatione, ut simul & venenum evacuetur, & alii humores ab infectione serventur, simulque apti ad concipiendam corruptionem peculiariter præserventur per ea, quæ antipathia quadam huic veneno adversantur.

§.8. Notandum verò est, purgationem omnium consensu cum pharmacis validioribus institui debere, ex eo fundamento, quòd humores peccantes ratione suæ substantiæ ac qualitatis non possunt, nisi cum vehementibus pharmacis, educi, quapropter Antiqui omnes proponunt *elleborismum*, uti omnium alio-



rum præstantissimum ac efficacissimum remedium. Proponunt quoque, *hieram diacolocynthidos*, *hieram Logadii*, præsertim etiam *hieram Pachii*: Laudant & *pilulas ex elleboro*, *elaterium*, *antimonium*, *pilulas de lapide Lazuli*, *Cochias*, de nitro ac fœtidas. Quòd si verò ætas, temperamentum, vires vel aër vehementiora talia non concedant; mitiora eligi possunt ac mediocria, ut est *Senna*, *epithymum*, *polypodium*, *elleborus niger*, *myrobolani nigri*, & *agaricus* præcipuè, qui simul veneno resistit.

§ 9. Sed residuis scopis jam fatis faciendum erit, ut nimirum veneni impressa corpori *diabæsis* corrigatur, partesque principes roborentur: ut eò melius venenum superare possint; id quod commodè medicamenta *alexipharmaca* præstare poterunt. Nec erit inutile, si cor muniatur cum externis quibusdam antidotis, ut cum *Theriaca* sola vel cum oleis famosis *Magni Ducis Heirurrie* aut *oleo scorpionis Matthioli*, quæ venenum evocare, & simul cor roborare valent. Cæterum cum plurima ab Autoribus recensentur tam simplicia quàm composita medicamenta specifica, atque non pauca fabulosa ex iis videantur, ideoque potiora quædam saltem in medium adferam. A plerisque commendatur *Alyssum*, planta, de quâ tamen autores non consentiunt, unde eam nunc in medio relinquemus: videri interim de eâ possunt *Galen. l. 6. simplic. med. facult. Tabernemontanus l. 2. herbar. sect. 5. c. 5. Sennert. l. 1. part. 2. prax. c. 16. Fr. Sanchez. qui juvat*, inquit, etiam *Alysos herba*, sed non cognoscitur a nobis. Magni æstimantur deinceps *cancris fluviales*, cum eorum cinis, tum decoctum multo *anetho* admixto, *scordium*, *chamædris*, *gentianæ radix*, *ruta agrestis semen*, *chamamelum*, *centaurium minus*, *artemisia*, *aristol. rad. sylvestr. rosa*, (quam tanquam oraculo repertum remedium commendat cum *Plinio Heredia, vincetoxic. radic. ʒjß. exhibitæ, pulegium, oxylapath., carduus benedictus*. Inter medicamenta composita, celebratissimum est *antidorum de cancris*, apud omnes scriptores summoperè commendatum, ut videre est ex *Dioscoride lib. 6. 37. Galeno 2. de antidor. cap. 11. testaturque Galenus*, neminem unquàm mortuum esse, qui cancrorum pulvere rectè usus sit, & quidem *lib. 11. de simpl. medic. facult. ex Æschione*, suo Præceptore, assumit cancros fluviales post ortum canis captos, quando Sol

leonem



leonem transiit, lunâ decimâ octavâ, & eos vivos in sartagine aris rubri impositos comburit: duo sumit cochlearia vel ℥ij. pulv. gentian. cochl. unum vel ℥j. vini merac. IV. cyath. vel ℥jss. vel paulò plus, quæ in modum polentæ dilutioris subacta quotidie bibenda exhibet. Porro ex *Asclepiade* recipit Galenus ciner. cancr. part. decem, gentianæ partes quinque, thuris partem unam, quorum simul mixtorum quotidie, exhibet cochlear unum, i. e. ℥j. & quidem boni ponderis, vel ℥iiij, cum aq. inspersione ad 40. diem, aut, si jam à morfu processerint aliquot dies, duo cochlearia quotidie propinari possunt. *Avicenna* quoque asserit, hoc remedium pro hoc morbo superando esse egregium ac peculiare. In quo tamen animadvertendum est, non solum marinos (uti quibusdam placet) cancos, sed etiam fluviatiles, à mari remotos, & dulcium aquarum, in usum vocari posse, quâ de re eruditè differit *Sachs in sua Γαμματολογία cap. 3. pag. 640. 641. &c.* Quantum commodi præbeat *Theriaca* ad superandam vim rabidi canis mortiferam, tam foris illita ulceribus, quàm intus assumpta, testantur Medici celeberrimi, præsertim *Zacut. Lusitan. de Medicor. Princip. Hist. lib. V. pag. 848.*, ut efficacissimum ac præstantissimum auxilium commendans, cui tutò in hoc affectu præcavendo fides dari possit. *Scribonius Largus lib. de compos. med. cap. 171. & 173.* laudat quoddam antidotum *Apuleji Celsi*, & cap. 176. aliud cujusdam *Cassii* & cap. 177. antidotum *Martiani*, Medici, cui quia nihil deest, τέλεια appellatur, hoc est, perfectum antidotum quod optimo cum successu in hoc malo curando adhibeatur.

A *Julio Palmario Constantino* Medico Parisiensi, *Fernelii* discipulo lib. de morfu can. rabid., alexipharmacum traditur, quod solum neglectis aliis remediis, imò & victus ratione, quocunque à morfu tempore usurpetur, certissimum ac tutissimum remedium existat, ut quo nullum unquam animal usum fuerit, quod non miserrimi hujus affectus periculum evitârit, quacunque uteretur victus ratione, est autem tale:

℞. Fol. rutæ, verben. salv.

plantag. polypod.

absynth. vulg. menth.

arthemis. melissophyll.

Beton.



beton. hyperic.  
centaur. minor. singul.  
æquale pondus.

Colligantur singula, ubi sunt efficacissima, siccentur in umbra. Hujus pulveris externum & internum usum felicem vide apud celeb. *Horst. Tom. 2. p. 334. B. Ti næum d. l.* Laudant quoque eundem *Sennert. lib. 1. part. 2. cap. XVI. pag. 440. Blasius Medic. univers. cap. 5. pag. 391. Petrus de Heredia in tract. variar. disput. 1. c. 4. pag. 13. Schenck. observ. 30. pag. 858.* Neque silentio involvendum *Hepar canis rabidi*, quod tanquam præsentissimum antidotum commendat prælaudat *Gr. Horst. d. l.*, si scilicet primis viginti quatuor horis post morsum nondum elapsis, coctum exhibeatur. Cæterum *Sudorifera*, ut venenum dissipetur exhiberi quoque possunt, ut *decoctum angelicae, petasitis, myrrhidis, carduibenedicti, scordii, pimpinell. & florum cordialium cum pulvere lapidis bezoar oriental. & theriacâ*: Commendat etiam veluti nobilissimum medicamentum, *mixturam simplicem Hartmann. in prax. chymiatr. pag. 59. & D. Michael. in Lit. ad Sachs.* attestatur, nihil se invenisse salubrius in morfu canis rabidi, quàm *spirit. 69. rectific. cum Tinct. bezoard. aa. commist. & ad gutt. 50. 60. exhibit. per aliquot dies, addito insuper pulv. 69. calcinat. & hac ratione nullis aliis internis remediis opus fuisse addit. Post sudorifera conveniunt etiam diuretica alexipharmacis mixta, vel exhibita, quæ utrâque facultate pollent, inter quæ præstant *spica celtica, valeriana, asarum, scordium*, & alia, quæ eodem tempore, quò sudorifera adhibentur, conveniunt.*

*Amuleta* quoque commendantur & præsertim ab *Hoffmann.* in opere *method. medend. libr. 1. cap. 19: de alterat. pag. 293.* Dens caninus à cane, qui momordit, avulsus, brachio alligatus. Corium itidem phocæ, ursæ. Descriptionem etiam alicujus amuleti videre licet apud *Schenck. lib. VII. observat. 33. p. 859.*

§. 10. *Fons dieteticus* suppeditat *Victus rationem* quæ & primas & supremas curationis partes in omnibus affectibus obtinet teste *Trallian. lib. 9. cap. 3. & quemadmodum semper ex adversa & prava diætâ morbi augentur, aucti deinceps celerius interitum afferunt: ita quoque bona victus ratio sæpè sola omne curationis punctum absolvit. Unde neque hoc in affectu, licet sola*  
haut



haut sufficiat, negligi debet. Sit itaque *Aer* mediocriter calidus & lucidus, in loco maneant sereno; aërem contra vitent crassum, loca frigida & obscura. Adsint continuò amici ægris, qui eos consolentur, erroresque ipsis patefaciant, mœroresque illorum timores atque iram jucunda conversatione omninò pellant. Fugiat ægotans cibos pravi succi & difficilis coctionis, pullos nimirum columbinos, qui à tota substantia hîc nocent. Præscribatur è contra simplex, & qui à proprietate juvet, qualis caro arietis perhibetur. Ex *piscibus* commendantur cancri Fluviatiles, quos præstantissimum cibum in prandio cœnâque statuit *Fr. Sanchez. lib. de venenat. p. 295.* Inter *fructus* utantur nucibus juglandibus, caricis, amygdalis, & pistaciis. Ex *herbis & radicibus* velcantur, allio, cæpis, raphanô, porrô, asparagô, & cichorio agresti & brassica. *Panis* sit ex farina optimi tritici, multô fermentô exceptus, cui semina quoque odorata vel aromata commoda immisceri possunt. *Potus* sit vinum meracum, quod omnibus venenis adversari, ab Autoribus asseritur. Hydromel etiam & Cerevisia absynthiaca, lactisque serum commendatur à *Joële in sect. 4. p. 146.* somnus & vigiliæ moderate sint. Alvus servetur lubrica ac aperta. Et Affectus animi, quantum fieri potest, rationis freno cohibeantur.

## C A P U T IX.

### Hydrophobiæ Curationem indigitat.

#### §. 1.

**H**Actenus de *Præservazione*, hujusq; scopis dictum est. Nunc quid agendum veniat, ubi aquæ timor supervenit, paucis videbimus. Equidem plerorumque judicio spem tunc valdè dubiam, imò ferè nullam esse, superius notatum; Interim ægros quominus prognosticis relinquamus, planeque deseramus, vetat christiana charitas, quippè quæ dum spirat, sperat; & verba, quæ *Sanchez. d. l.* profert, quasi sua faciens, dicit: *Contingit autem quandoque, ut etiam hi servantur.* Quare horum quoque curam, quantum licet, geremus.

§. 2. Notatu v. dignum, quod *Avicenna* scribit: signum nondum conclamatae salutis esse, si intuentes ægri in speculum, se ipsos cognoscant, mensque adhuc valeat. Sed utut habeat, ceu dictum, deferendi non sunt.

#### §. 3. Cum



§. 3. Cùm itaque eò usque res devenit, ut jam æger ὁδοπόρος factus fuerit, supra laudata remedia appropriata ex *pharmaceutico* fonte deprompta, in usum denuò vocanda sunt. Propinari autem debent in majori dosi: sic, licet *Palmarii* pulv. aliàs ʒj. sufficere soleat, possumus tamen autore *Herediâ*, ad ʒij vel etiam ʒiʒ. usque ascendere, & ægro die quolibet præbere. Et monet ipse *Palmarius*, omni artificio id tentandum, ut assumat; hinc etiam ægrum vinciri, & ore aperto pulverem suum infundi jubet. Idem quoque quoad alia id generis præsidia observare convenit, inter quæ præstant etiam *pulv. serpentum & viperarum*, quem describit *Roderic. à Fonseca lib. 1. conf 25. p. 173.* Cæterum de *Purgatione*, ut & V. S. quam conducere arbitratur *Sanchez. d. l.* dubito; certè cum utriusque præsidii magna vis sit, & efficacia, singulari hinc, prout ipse monet, cautione opus, & longè tutius esse reor, enarratis *alexipharmacis* & corroborantibus prudenti curâ inhærere.

§. 4. Restat, ut, quandoquidem *Aque potus*, & *in aquam immersio* à multis egregiè commendatur, de his quoque brevibus dicamus. Sunt qui solum marinam aquam prodesse asserunt, alii vero & dulcem laudant: suadentes insuper omni arte ut aquam bibant ægri, moliendum esse, & ne hanc timeant, longissimis ac tenuissimis fistulis metallicis è longinquo adducendam monent. Verùm quàm parùm hoc conferat, videre est apud *Herediam*, & alios. Pariter se res habet quoad immersionem in aquam, seu, uti *Helmont.* vocat, *Ideæ* dementis suffocationem: magni quidem illam faciunt *C. Celsus l. 5. c. 27. Baccius de Thermi l. 5. c. 2.* aliique plures, sed licet fortè respectu præservationis aliquid largiri, cum aliis, possem, tamen in ipsa curatione sive aquæ potum, sive immersionem insigniter prodesse, ut statuam, tot prohibent infelicitis admodum successus exempla, quæ passim apud gravissimos autores legere est. Quare potius subscribo *Palmario & Codronchio*, qui multum in hoc argumento præstiterunt, nec firmis destituuntur rationibus, interim non dubitant, tam aquæ potum, quàm & immersionem in aquam, sive dulcis fuerit, sive marina, tanquàm maximè noxia, interdicere.

§. 5. Plura pagellarum angustia non admittit, igitur filum abrumpo, sperans, me æquum ubique ac benevolum lectorem reperturum, qui in magnis & voluisse satis esse iudicet.

§. 6. Tibi verò ô cælestis Archiater JEHOVA, cujus donum Medicina est, Tibi pro præstitis hastenùs animi & corporis viribus immortales sint gratiæ; fac quæso ut vergant hæc omnia in Sanctissimi Nominis Tui gloriam & ægotantium salutem.

## COROLLARIA.

I. *An Hydrophobia novus planè & antiquis incognitus morbus? N.*

II. *An Morsus Canis rabidi templo divò Dononi, vel sacello Divi Bellini sanetur? N.*

III. *An Virgilius in Medicinam fuerit injurius, dum eam mutam atque in gloriam vocavit? N.*

IV. *An, si Curatio nō procedat, mutanda statim sint remedia? N.*

V. *An τὸ θεῖον Hippocratis ad causas occultas pertineat? Aff.*

VI. *An matutina studia vespertinis sint salubriora? Aff.*

F I N I S.






**B**EYERE, *Coī* cui studium placet,  
Et qui medentum docta volumina  
Versare jam dudum inchoāsti,  
En! Tibi rara viret corolla!

Funestio rem dum *rabidi canis*,  
Sat erudito consilio, doces  
Sanare *morsum*; Phæbus artem  
Approbat, ingeniumque laudat.  
Edax caninis rodere dentibus  
Livor laborem gestiit improbum:  
Sed cūm videret, Te efferatis  
Morsibus egregiè mederi,  
Mox abstinebat. Iamque scientiæ  
Pindus brabéum splendidius parat;  
Io! faxit *artis* primus Autor  
Iova, tibi benè cuncta cedant!

*Pereximio Dn. CANDIDATO*  
*ngi cuuolup dilectissimo benevoli affe-*  
*ctus monumentum posuit*

LAURENTIUS Strauß/  
Med. D. PP.



**F**raternam renouas Laudem *Clarissime Beyer*,  
Dum Cathedram scandis, pandis & artis Opes:  
Ingenio & Virtute simul Te sistis adultum,  
Sis ætate licet nunc minor, arte potes:  
Arte potes, monstrasque simul, quòd dulcis Hygeia  
Ettuate Virtus jam facit esse Virum.


Unde



Unde Tibi meritas *Suprema Licentia* laudes  
Præparat, *ingenii præmia* digna tui !  
Scilicet hoc pretium vitæ est, habitique laboris  
Gloria, Doctoris Ius, Tituli que Decus.  
At Tu cui meritum tribuit Schola Tanta Brabéum,  
Spernito iudicium, quod dare Vulgus amat ;  
Proximus ille Diis vivit, qui talia ridet,  
Fatorumque vices publicat absque metu.  
Dumque facis, moneo quæ, tantos grator honores,  
Et grator Patriæ, grator & inde Tuis.

*Praclarissimo Domino Licentiato amicitiam  
intemeratam sic testatur, Novis que ho-  
noribus gratulatur*

Ernestus Bogislaus Moscherosch.



**E**xantlatorum Frater nunc Dona Laborum  
Restant, quæque paras sedulitate tua.  
Ultimus hic labor est, Cathedram cum scandis, & ore  
Docto te dignum gnarum honore probas.  
Hoc tibi fraterno voveo de pectore, Frater,  
Ut te Chironem sistat Hygeia Tuis,  
Ut cum mentis opes Italæ Gallisque probasti,  
Visere quos properas, ingenique dotes:  
In patriam redeas optatus & auctus honore,  
Quem studio Medico te meruisse ferent.  
Quæ si nactus eris tandem, charissime Frater,  
Splendor eris Patriæ, splendor & orbis eris.

*Paucula hæc Fratri plur. dilecto festinante  
calamo deproperabat,*

IOH. ADOLPHUS *Beper*/U.I.D.